

Siunnersuut uunga: Ilinniarnertuunngorniarneq pillugu Inatsisartut inatsisaata allanngortinnera pillugu Inatsisartut inatsisaat nr. XX, XX.XXX 2014-imeersoq

pillugu

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap

ISUMALIUTISSIISUTAA

Siunnersuutip aappassaaneerneqarnerani saqqummiunneqartoq

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap suliarinninnermini makkuninnga inuttaqarpoq:

Inatsisartunut ilaasortaq, siulittaasoq Ruth Heilmann, Siumut

Inatsisartunut ilaasortaq, siulittaasup tullia Per Berthelsen, Siumut

Inatsisartunut ilaasortaq, Mimi Karlsen, Inuit Ataqatigiit

Inatsisartunut ilaasortaq, Harald Bianco, Inuit Ataqatigiit

Inatsisartunut ilaasortaq, Randi Broberg, Parti Inuit

UPA14-mi ulloq 25. marts 2014-mi siullermeerinerup kingorna siunnersuut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap misissorpaa.

Siunnersuutip imarisaa:

Siunnersuutip tunngaviatigut imarivaa, ilinniarnertuunngorniarnermut piareersarnermut atatillugu faginik ataasiakkaanik neqerooruteqartarnerup ingerlatiinnarnissaa, siornatigummi erseqqissumik tamanna pillugu aalajangersaasoqarsimanngimmat.

Siornatigut sinerissami ilinniarnertuunngorniarnarfinni marlunni tamanna ingerlanneqarsimavoq. Ilinniartitaanermut Kultureqarnermut, Naligiisitaanermullu pisortaqarfimmit august/september 2013 misileraalluni ilinniarnertuunngorniarnarnerit misissorneqarsimapput, pingaartutullu isigineqarluni piareersaataasunik ilinniarnertuunngorniarnarnermi fagini ataasiakkaani angusat pitsaasut inerisarlugit suliarineqarnissaat. Inernerisa takutippaat pingaaruteqartoq ilinniagaqalernissamat piareersaataasunik pikkorissarnissamat kiisalu ilinniartitsisut ilinniakkamikkut piginnaasaasa minnerpaaffilerneqarnissaannut maleruagassaqalernissaa, taamaattumillu aalajangersagaqarnissaq matumani erseqqissaatigineqarsimalluni.

Inatsisartut siunnersuummik siullermeerinninnerat:**Siumut**

Siumumit kissaatigineqarpoq oqaatsinut fagini Kalaallisut Danskisullu tiimit amerlineqarnissaanik eqqarsaat itisilerneqassasut. Siumullu kalaallisut ilinniartitsisunik ilinniarnertuunngorniarfinni inuussutissarsiutinullu ilinniartitsisunik amigateqarnermut kinguneqartitsisinnaanera ilanngullugu qulaajarneqarnissaa kissaatigaat.

Inuit Ataqatigiit

Inuit Ataqatigiit inatsisissatut siunnersuut pitsaasutut isigaat, isumaqarlutillu inatsisissatut siunnersuutip tusarniutigineqarnerani susassaqtut tamarmik ilanngunneqarsimasut.

Atassut

Atassutip 11. klassit atuutilerseqqinneqarnissaa sulissutiginiarpaat, taamaalilluni inuusuttut sapinngisamik amerlanerpaat ilinniarnertuunngorniarfinnut isernissamut piginnaanngorsarniassammata. Kiisalu Atassut isumaqarpoq inatsisissatut siunnersuutip kalaallisut allassimanera misissoqqinneqassasoq, siunertamut naapertuunnersoq takuniarlugu.

Demokratit

Demokratit Inatsisissatut siunnersuut annertunerusumik oqaaseqarfiginagu ilalerpaat, ataatsimiititaliamullu suliareqqitassanngorlugu ingerlatillugu.

Parti Inuit

Parti inuit ujartorpaat ilinniarnertuunngorniarfiit ataasiakkaat suliassaq qanoq ilillugu kivissinnaaneraat.

Minnerunngitsumillu Parti Inuit isumaqarlutik sapinngisamik amerlanerpaat namminneq oqaatsitik atorlugit ilinniakkanik naammassinnissinnaasariaqartut. Naggataatigullu parti Inuit Naalakkersuisunut kaammattuuteqarlutik inunnguutsimik oqaatsit ilinniagaqalernissamut akornutaannginnissaanik. Qulaani pineqartut tunngavigalugit Parti Inuit Inatsisissatut siunnersuut itigartinniarpaat.

Parti Naleraq

Parti Naleraq isumaqarpoq amerlavallaartut meeqqat atuarfianit aninermiit ingerlaqqinngitsoortartut – tamannalu piaartumik iluarsisariaqartoq. Pissutsit imatut iluarsineqassapput ilinniartitaanerup ineriartorteqqinneqarnerani inuiaqatigiinni sanngiinnerit tamarmik peqataasinnaassallutik.

Tusarniaanermi akissutit

Inatsisissatut siunnersuut susassaqtunut tusarniutigineqarsimavoq tusarniaanermilu piffissaq 6. December 2013-miit 3. Januar 2014 atorneqarsimalluni. Ataatsimiititaliamit Naalakkersuisunut kaammattuutigineqassaaq, siunissami tusarniaanerni sapaassuit sulinnigiffeqarfiillu eqqarsaatigineqartarnissaat, taamaalilluni piffissani taakkunani tusarniaaneq sivitsorneqarsinnaaqqullugu.

Ataatsimiititaliap siunnersuummik suliarinninnera


Ataatsimiititaliap isumaqatigiittup inatsisissatut siunnersuut naammagisimaarpaa, ataatsimiititaliap aammattaaq immikkut naammagisimaarinnini erseqqissaatigiumavaa GU'eqarfiit namminneerlutik qaqugu fagini ataasiakkaanik ilinniartitsinerit holditut aallartitsisinnaanerit aalajangertalissammassuk, ilinnialertussat qassit qinnuteqaraangata killerititassamik aalajangersagaqanngikkaluartoq.

Inassuteqaat:

Tamanna tunngavigalugu amerlanerussuteqartut, tassaasut Siumut aamma Inuit Ataqtigiit siunnersuut akuersissutigineqassasq innersuussutigissavaat.


Ataatsimiititaliami ikinnerussuteqartup Partii Inuit siunnersuut akuersissutigineqannginnissaa innersuussutigaa.

Taamatut oqaaseqarluni ataatsimiititaliap siunnersuut aappasaaniigassanngortippaa.


Ruth Heilmann

Per Berthelsen


Mimi Karlsen


Harald Bianco


Randi Brøberg